



Lise o Carmen?

Al è cualchidun che mi ten la man. Cualchidune.

O soi dismot.

No vuei dismovimi.

O ai mâl.

No vuei cjalâ.

Une gusele inta man drete, une canule drenti intal nâs, cuissà ce altri!

No vuei il mâl, no vuei vê mâl.

Il mâl al è li, pront a saltâmi adues. Baste che o vierzi i voi. No vuei. Mior tignîmi il mâl di prime, mi ten il mâl di prime, sior dotôr, mi ten il gno cûr mat, il so bati ledrôs, i mancjaments, il flât che nol torne, dut o mi ten, dut chel che o vevi prime di jentrâ inte sale operatorie, ma no stait metimi lis mans intôr, no stait a vierzimi lis cuestis. No stait a fâmi chest mâl.

Za fat.

Carmen o Lisute?

Mi àn viert. A àn di vêmi viert. Lis cuestis e il cûr. Ma i voi no, no vuei.

Mi dûl intal cuel, no pues gloti, la schene, la schene e je daûr a crevâsi. E nol è ancjemò nuie, rimpet a chel che al à di vignî!

No vueil dismovimi, cuissà cetant mâl intal pet! No vueil, no vueil! Il mâl al è li, pront a saltâmi intor, apene che o vierzarai i voi al mi saltarà intor e al tacarà a molâ jù martieladis sulis cuestis, mi pâr za di sintîlis! E daûr des martiealadis e je platade une altre robe, une robe che no vueil savê, no vueil dismovimi, Lise o Carmen?

No soi dismot.

No ai vierts i voi.

Fin che i voi a son sierâts il mâl no mi gafe. E nancje chê altre robe, chê platade lì daûr. Carmen o Lise?

...l'efiet al è par finîsi...-

Cui fevelial? Cui aial dit che... Cui ise culî dongje?

Ah, sî. L'infirmitâr. Magari un dotôr. No je mighe operazion di pôc la mê! A cûr viert! Nuie maravee se al è un dotôr vignût chî a viodi ce maniere che o voi.

Ma cun cui? Cun cui fevelial, nol fevelarà mighe di bessôl?

No vueil savê! No vueil vierzi i voi! No vueil savê cui che al mi ten la man.

Cui mi tegnie la man?

Al è par chel che no vueil sveâmi dal dut, par no savê.

No par vie dal mâl. Chel, aromai, mi tocje, o ai di supâmilu su dut, gote par gote, nol è nuie ce fâ.

Ma savê cui che al è daûr a tignîmi la man... chel no, no vueil.

No vueil savê cui che mi ten la man.

Se o pensi (ma se o pensi, al vûl dî che o soi cussient, che o soi dismot!), se o pensi a Lise, o viot ancjemò i biliets culis partecipazions des gnocis, za fa scuasi trente agns.... 'Si sposin! O varessin plasê che tu... Lise e Dino'

Ise jê, ise Lisute sentade lì che e mi ten la man?

O ben ise... o ben ise Carmen? Carmen se ti ves cognossude prime! Carmen tu mi âs puartât in cîl par moments e no savevi che si podes rivâ in cîl!

Lise o Carmen?

Cui mi tegnie la man?

Velu il mâl che al cruste, al pache, al muart! O crustî i dincj ancje jo, une man sul zarneli, cui sestu? Cumò o vierç i voi.

Cui sêstu?

**di Laurin Zuan Nardin**

**#197**